



# Bájkkeavijssa NuorttaSálto



**STUORRA BERUSTIBME.** Duot dát fáhkkaulmusj lij sadjiha fáhkabejvijn psyhkalasj varresvuodabargo gáktuj Nuortta-Sálton.  
**STOR INTERESSE.** Ulike fagpersonell var på plass under fagdagene for psykisk helsearbeid i Nord-Salten.

Tæksta: Kitty Skapalen  
Járggálibme: Divte Media AS

## Dárbahi gus sáme ietjálágásj giehtadallamav sijá psyhkalasj vájvijs?

Dáv gatjálvisáv psykologtjehppe Akkutteaman SANKS'an, Snefrid Møllersen ávdedij gá ásaduvvin fáhkabejve psyhkalasj varresvuodabarggij Nuortta-Sálton dá vahko.

Divtasvuodna, Stájggo ja Hábmara suohkana ásadin fáhkabejvijt Hábmmer Hotellan aktan RKK Ofoten. Birrusij 60 persávná Saltdales oarjjás Narvikkaj nuorttan oassálasstin daj bejvijn. Ulmejuogos lidjin virgálettja psyhkalasj varresvuodadievnnon/gárevsælgga, sijddaásadum dievno, NAV/sosialetáhtta, dáktárdievnastus, mánájsuodjalus, varresvuodastásjávnná ja sierravarresvuodadievnno aktan addnij ja iehtjádij gudi psyhkalasj

varresvuodajn barggi.

### Visjávnná ávdánahtátjit buorre psyhkalasj varresvuodasuodjalusáv sáme álmugij Vuonan

Vuostasj bejvve lij dássju sáme álmuga vuosstij tjalmostahtedum. Prosjektajádediddje SANKS'an, Tone Finnesen ávdánbuvvtij oanegattjat SANKS'a birra, mij le sáme nasjonálasj máhtudakguovdásj.

SANKS'an le nasjonálasj ávdásvástádus oassálastátjit ávdánahttemij avtaárvvusasj fáldaldahkaj psyhkalasj varresvuodasuodjalusáv sáme álmugij Vuonan.

- Lev riek dudálasj gá nav moattes tjáhkanin, mij vuoset sábmme jerudaláduvvá varresvuodabarggijs ma ájggu ienep máhtudagáv ja dádjadusáv oadtjot sáme varresvuodabarggij, javlaj sán.

Divtasvuonan le SANKS kántávráv jagev adnám ja Finnesen vuoset SANKS'an li positijvalasj átsádallama bargos.

- Mij vuojnnepp dárbov sihke állessjattugijda, mánájda ja nuorajda. Riek ájnas le mij gávnup birrasin ja dárbbo le diedojt, áhpadimev ja bagádallamav vaddet dajda gudi dájna

ájnas bargujn barggi. Álu le gáktu pasiennta terapeutav ievvvi mij le ájnnaamos, miejnni Finnesen. Sán le riek dudálasj gá nav moattes li fáhkabejvijda bohtám, ij dássju dajs gálmma Nuortta-Sálto suohkanijs, valla aj ietjás suohkanijs ja ásadusájs fylkan.

### Varresvuodadájmadahka viertti ietjas miellaguottov sámij gáktuj rievddadit

Psykologtjehppe Akutteaman SANKS'an, Snefrid Møllersen gatjádij "Dárbahi gus sáme ietjálágásj giehtadallamav sijá psyhkalasj vájvij gáktuj", ja vásstedij tjelggasit e dárbaha.

- Sáme e sierralágásj giehtadallamav dárbaha, valla varresvuodadájmadahka viertti oahppat sámij ievvvit ja sidjij avtaárvvusasj giehtadallamfálaldagáv vaddet, miejnni sán. Lágádallamin dáttodij gájka lip oasse mijá kultuvas ja ievvimin pasienta ja terapeuta gaskan le ájnas makkir miellaguoddo terapeuta vuoset. Jus giehtadallam galggá vuorbástuvvat viertti liehket aktisasj semalasjvuohhta ja dádjadus gássjelisvuoda birra ja semalasjvuohhta ulme birra.

- Terapeuta vierttij sosiálasj dássáj bohtet gánná pasiennta le. Álu le nav gá ienepláhkuj gullu de jáhkkep ulmutja unneplágoduogátjin aj ájádalli ja dahki sámmi láhkáj gá ienepláhkokultuvas, valla nav gal ij le, javlaj sán.

Grethe Dunfjeld, guhti le pedagoga Mánáj- ja nuorajpsykiatralasj poliklinkan SANKS'an, vuosedij makkir hástalusájt terapeutajn li gá sáme klientajn ievvvi. Kjell Andersen, psykiatralasj skihppijsujttár Akkutteaman SANKS'an vuosedij átsádallamijda buoredamprosessajn alvos psyhkalasj vájvij merrasáme guovlojn.



**Hásstalusá sáme guojmijda.** Familljaterapeuta SANKS'an Reidun Boine le álov barggam hástalusáj majt sáme guojme ievvvi bæjvålasjellemin ja tjalmostahtij makkir vuorddemusá ja dárbbo sáme guojme ievvvi almulasj viehkeapparátan.  
**UTFORDRINGER** for samiske par. Familjeterapeut i SANKS, Reidun Boine har jobbet mye med utfordringer som samiske par møter i hverdagslivet og tok for seg hvilke forventninger og behov de samiske møter i forhold til offentlig hjelpeapparat.